

四庫全書

史部

欽定四庫全書

史部

硃批諭旨卷一百二十六之二十一

臣 永瑤 恭校

編修<sub>臣</sub> 裴謙覆勘

總校官中書<sub>臣</sub> 朱 鈐

校對官助教<sub>臣</sub> 卜惟吉

謄錄監生<sub>臣</sub> 許蔭培

欽定四庫全書

硃批諭旨卷一百二十六之二十一

硃批田文鏡奏摺

雍正八年三月十七日河東總督臣田文鏡謹

奏為恭報豫省得雨日期仰祈

睿鑒事竊查豫省春初雨雪沾被調勻經臣節次奏

聞茲查開封府地方於二月二十五日得雨二寸又於

三月初七日戌刻起至初九日寅時止得雨六寸

所屬各縣亦於初八日得雨四五寸不等又三月十一日開封并所屬各縣得雨三四寸不等又十四日申時起至十五日寅時止開封省城又得雨三寸有餘其外府州縣有報於二月十九二十等日得雨霑足竝得雨三四五寸不等者有報於二月二十五及二十七八九等日得雨四五六七寸不等者有報於三月初七八等日得雨霑足及四五六寸不等者甘雨及時田疇普被合計通省均

已沾潤滋足現今各處二麥俱高一尺五六寸穗  
已先後吐齊高糧長至三四寸許穀黍苗發甚旺  
棉花亦已出土芝麻雜豆均各播種在地閭閻婦  
子樂此五風十雨靡不感戴

皇仁共欣時若所有豫省得雨日期及麥苗穀黍長發  
情形理合恭摺奏

聞仰慰

聖懷再東省州縣亦據報於二月二十五及二十九日

各得雨二三四寸不等合併

奏明伏乞

睿鑒謹

奏

覽奏豫省膏澤調勻麥已結穗穀黍俱長發茂盛東省  
又已及時得雨朕懷曷勝慰悅都中自入三月以來日  
起風霾甚覺乾旱於此奏未到之前一日荷蒙

天

祖眷佑慈恩甘霖大沛郊野優渥而山陝兩省亦於月之中旬各報霑足朕惟額手欣慶期與卿等共勉寅畏以敬迓秋成之

嘉貺耳

同日又

奏為桃汛已過工程平穩臣謹繕摺奏

聞仰慰

聖懷事竊臣伏查豫省黃河南北兩岸堤工頻年以來

仰蒙我

皇上敬

天勤民之念上格

穹蒼是以黃流順軌汎水安瀾河泓刷深埽壩堅固而億萬生靈靡不永安衽席矣前因桃汎將屆臣隨檄飭管河道祝兆鵬河北道朱藻等督率廳營印河員弁住守沿河堤岸帶領兵夫加意修防巡查料理不許絲毫怠忽去後茲據該河道等報稱自雍



正八年二月十八日清明起至三月初八日止黃  
河長水三尺三寸至三尺九寸不等今已消落一  
尺七寸至二尺不等竝無出槽又沁河長水一尺  
九寸今已消落九寸所有南北兩岸一切堤埽工  
程俱各保固平穩通省臣民咸皆歡欣踴躍感頌  
皇仁但轉盼入夏即屆伏汎臣仍嚴飭管河各官加謹  
修防外所有挑汎已過工程平穩緣由理合恭摺

奏

聞上慰

聖懷伏乞

睿鑒謹

奏

伏汎將屆而雨澤頗饒亟宜飭諭屬員倍加小心敬慎  
恐管河各官目覩河工就緒屢慶安瀾漸生怠忽之念  
也卿等亦當慎之益慎以防不虞將此諭令嵇曾筠知  
之

同日又

奏為欽奉

聖訓據實覆奏事雍正八年三月十二日臣齋摺家人  
捧回

皇上硃批諭旨到臣臣敬啟跪讀於臣奏明山東江南  
河道歸海一案竝請將呂維炳暫留充寧道任摺  
內欽奉

硃批呂維炳熟悉水道情形暫留東省所請是嵇曾筠

亦經奏請但淮徐道之任既司出納而又兼管河務甚屬緊要候朕與大學士等再加斟酌有旨欽此查淮徐原屬要地今臣以呂維炳勘估工程請為暫

留荷蒙

允卿所請已有旨矣

聖慈原鑒且致仰費

天心臣惟有速飭呂維炳上緊查勘竣事以便令其馳赴新任庶以仰副

皇上慎重河漕之至意又於臣奏請添修豫省軍器摺

內欽奉

硃批覽傳為斗朕因念伊前人擢用今職觀其質地止  
不過誠慤而已未見所長或恐弗克勝任然歷俸日  
久營伍事務想應諳練也卿意以為何如欽此臣查  
傳為斗於今歲正月內來至開封見臣觀其人循  
循本分與之講論營伍尚屬明白通曉誠如

聖明所鑒查其到任以來辦事謹慎小心惟聞待兵過  
寬致有兵丁酗酒打架以及強買與民爭毆之事

朕正臣已切札諄囑令其嚴加訓約務須整飭紀律不  
遵循作何施措再奏以聞  
得博取寬大之譽以長弛縱上負

天恩簡用之隆是否克勝其任臣當再觀後效另行據

實奏

聞又於臣奏纂修豫省志書摺內欽奉

硃批筆墨之事固不宜忙迫然亦不宜甚遲作速纂修  
完竣庶可杜請託營求之弊欽此仰見我

皇上表彰垂信紀載核實之至意雖纂修之事採摭紛

繁然臣自不敢聽其延挨時日以啟弊竇務期考

據詳明無闕無濫庶以仰副

聖<sup>好</sup>意又於臣奏東省滿營摺內欽奉

硃批覽奏知卿欲即在青萊等處採買木植以圖省便  
但榆楸槐楊四種內惟槐木稍堪經久而又難多得  
殊與朕意不甚相洽且此項工程不湏急促辦理便  
遲至經歲無妨拉錫胸中頗有見解俟其到日令承  
辦各官與之商酌由南購載如慮滋費需時或從北

直採辦運往較稍勝否更會同偏武周詳妥議本省  
覓買雜木之舉總宜暫緩倘臨時必用就近取材以  
資營造尚不致有遲誤也於此等事無庸過費精神  
差委京官前來正為欲卿減省心力庶得經畫地方  
緊要政務之意卿其知之欽此臣跪讀之下感激涕  
零伏以犬馬之微仰蒙

聖主顧復體恤無不周至雖臣之心力臣實未能自愛  
至於此極也捐糜踵頂何能報稱在滿營工程重



大臣既駐劄隔省未能親身相度其中機宜臣實未能曉暢今蒙

命都統臣拉錫經畫定議仰見我

皇上睿慮周詳經營盡善至於木植一項已聞拉錫等

果與

朕意不約而同也

有自天津運東之議承辦官員臣已諭令協心贊

理聽候指揮在臣惟有恪遵

聖訓但竭心力辦理地方不敢有厯

睿念也所有奉到原摺理合恭繳謹

奏

頃覽拉錫所奏區畫處逐件俱屬妥協現命議政大臣  
議行此建設滿城一事卿可不必勞心前諭甚明其遵  
奉毋違

同日又

奏為奏明事竊惟考察吏治固在於歷事之後而鑒  
別才具尤應於蒞任之先是以臣於河東兩省屬  
員當其初到地方每留心察核隨事策勉以期仰

副我

皇上造就人才之盛心茲查河南布政使趙國麟已於  
雍正八年二月初八日到任訖臣見其辦事勤力  
且能虛心善受不自滿假人亦和平謹飭雖有足  
疾步履甚艱然藩司列在大僚所資者識見謀猷  
足以振綱挈領非必如府州等官尚有趨蹌奔走  
之勞也但其才具中等見事不能透徹臣與朝夕  
密邇隨時隨事備細訓勵以期精進又山東布政

使孫國璽於雍正八年二月初二日到任訖其向日居官勤慎操守清廉臣所深信今蒙

聖恩優渥

簡用東藩益復感激圖報奮勉辦事但所虞者才情亦不甚優山左積玩之習尤貴振作臣是以將東省事宜逐條開單指示令其遵照奉行且恐其初蒞地方未能周悉情形按察使唐綏祖久於東省諸務明白臣竝囑其協力同心和衷贊助庶幾均有

所裨又山東糧道朱潘查於雍正七年十一月二十九日到任今春監兌事畢二月內赴豫見臣觀其語言明晰似屬通曉事務但恐此中圓活未必能錚錚自持任勞任怨臣亦面為諄諭務當盡力竭誠毫無瞻顧不可沽邀虛譽上負

聖明又山東濟南府知府楊在魁荷蒙

簡用來東該員先至開封見臣遂於雍正八年正月初十日到任臣觀楊在魁器識明敏才具似優臣與

面語一切事宜俱能領會到任後凡所稟行措置亦皆井井有條若能始終不渝當為大有造就之人臣亦獎勵勗勉俾其鼓舞自奮冀與有成以上各員均係到任未久容臣細觀後效據實奏

聞再開封城守尉副都統白成額到任以來臣欽遵諭旨剴切勸勉俾其實心任事白成額感頌

天恩矢切圖報亦將所奉

聖訓敬謹告臣其應行事宜無不向臣商酌蒞事數月

臣見其居官謹飭勤於操演兵馬亦能約束旗人  
地方相安從此竭誠奮勉自可不負

皇上委用之

隆恩臣仍留心規導務期仰副

聖諭所有白成額現在勤慎緣由理合一併

奏明伏乞

睿鑒謹

奏

趙國麟等才具之長短優劣覽卿陳奏業俱備悉至開封城守尉白成額尚恐未能盡職今果若此殊為可喜之事省朕幾許籌酌矣

同日又

奏為奏明東省營伍情形竝酌選題補人員仰祈

睿鑒事竊查山東一省路當衝要遠控海濱所有各營兵馬自應整飭練習以資實用臣於雍正六年九月間赴東巡視即於經過沿途營汛查驗弁兵見



其技藝生疎步伐參錯馬匹率多疲瘦臣隨照會  
兩鎮總兵官又逐一面諭將備令其痛改積習加  
意整頓務將所管兵馬操演純熟餵養臙壯迨至  
回豫後節次嚴檄通飭冀有成效於雍正七年冬  
底分委豫東兩省營員逐加點看令其據實冊報  
嗣據各員查報登鎮所屬之左右二營膠州營即  
墨營兗鎮所屬之臨清營臺莊營東昌營沙溝營  
以上各營馬步兵丁弓箭鳥鎗藤牌等項嫻熟次

熟者多中平者少馬皆臙壯可觀又登鎮所屬之水師前營青州營武定營萊州營濟南營壽樂營充鎮所屬之左右二營沂州營德州營高唐營范縣營以上各營馬步兵弓箭鳥鎗藤牌等項嫻熟者少中平者多生疎者亦有馬匹臙分滿歟不  
等又登鎮所屬之文登營寧福營安東營充鎮所屬之曹州營泰安營梁山營壽張營以上各營馬步兵弓箭鳥鎗藤牌等項仍多生疎馬匹亦無

臆壯各據冊報前來合之臣訪聞無異臣擬擇其  
營伍之最欠整飭者指名叅究但查內有甫經署  
事及莅任未久者其弛廢之咎多不在現任之員  
臣每仰見我

皇上愛惜人材舉措用舍之間務得其平是以上體

聖懷暫予寬假除將兵丁技藝優嫻馬匹頭臆者行知  
獎勵其技藝平常生疎馬匹臆分不足者嚴加申  
飭勒限三箇月一律操演精熟餵養臆壯俟三月

限滿臣再另委不徇情面之大員前赴點驗如其  
兵丁馬匹仍無改觀臣即將該管弁員指名

題叅不敢少有縱庇惟是臣去東省既遠而登膠一  
帶地方僻處海隅尤為鞭長莫及之勢其各營將  
領非得實心任事訓練有方堪以委託者莫由收  
指臂之效查膠州營副將張孟儀即墨營叅將宋  
愛均為勤敏強幹之員該員等於雍正七年五六  
月內先後調陞東省今尚未滿一年而營伍改觀

實有成效至如文登一營海疆要地前任文登副

曾謨原非朕賞鑒之人一則念伊勞效二則因卿於副將

將今陞登州鎮臣曾謨在任四年有餘因循舊習

內列為優等而登鎮要缺一時又難得其選故爾就近擢

未能整頓致文登一營兵馬僅止在於三等之末

授今據奏稱在任四年因循舊習以致營伍廢弛然則從

臣因念曾謨仰荷

前何以列名於優等耶當再三訓誡令伊竭力奮勉以贖

天恩簡用封疆想其清夜捫心諒無不感奮竭蹶勉圖

前尤倘不能後效之理而曾謨亦自知其營伍廢弛急需幹員

後效之理而曾謨亦自知其營伍廢弛急需幹員

以聞

振作當經該鎮委令即墨營叅將宋愛署理臣於

曾謨到任時遂有諄札囑其殫盡忠誠上酬

高厚容當察其總兵任內倘或仍前因循不自奮勵臣

即據實奏

聞臣正欲將各營情形備悉入

告茲欽奉

上諭將宋愛調補汾州營叅將又

命署理山永協副將事務所遺即墨營叅將員缺奉

旨令臣遞行

題補仰見我

皇上慎重營伍必期人地相宜以收實效之至意臣查  
宋愛之在東省臣實藉其整飭用以表率各營今  
山永協係邊要之地奉

旨命往署理臣亦未敢請留謹將所遺員缺再四酌選  
查有河南南陽鎮左營遊擊楊鐸曉暢營務居官  
廉幹堪以補授即墨營叅將其所遺南陽鎮左營  
遊擊員缺查有山東兗鎮左營遊擊李登華臣前  
次雖經

奏明該遊擊尚堪任使但以之幫助岳含奇恐未必  
大得贊勦之力今請以李登華調補南陽鎮左營  
遊擊其所遺充鎮左營遊擊員缺查有山東沂州  
協守備王之祿才技優長熟練營伍經臣於雍正  
七年三月內

題補守備送部引

見奉

旨王之祿人甚去得效力行間著有勞績著行文田文



鏡遇有遊擊缺出題補欽此欽遵在案今請以王之  
祿陞補充鎮左營遊擊更必竭力圖報可以幫助  
岳含奇整飭營伍其所遺沂州協守備員缺查有  
山東高唐營千總路成年力精壯漢仗亦好曾隨  
川陝督臣岳鍾琪進征北川西海桌子山各處著  
有勞績堪以請補沂州協守備除另行恭疏

題補伏候

聖裁外謹將山東營伍情形竝酌選人員一併恭摺

奏明仰祈

睿鑒謹

奏

酌選各員俱屬允協具題到日有旨

同日又

奏為奏明事竊查東省營汛員弁惰玩成習不知操練營伍惟以弛縱為得計不知管束兵丁專以庇護為愛惜其或兵民相犯則營員必欲左袒其兵

該管文武先相齟齬各持意見以故兵丁恣肆目  
為尋常臣仰荷

天恩節制兩省屢屢剴切訓諭務期兵民安戢力除舊  
習詎知長清縣汎兵馬守業蕭殷成等白晝強拉  
民婦袁氏共飲不允隨將袁氏採打撕衣袁氏赴  
縣喊稟各兵奔至縣堂咆哮不服該縣以營兵強  
拉民婦兇毆撕衣且目無官長閤閤公堂事屬不  
法聲明該汎千總馬紹援公出泰安州將馬守業

等肆橫緣由具詳通報臣隨批山東按察使移營  
革糧嚴審確情律擬招報并取該營不行約束職  
名報叅去後乃千總馬紹援袒護兵丁並不革糧  
移審反為營兵捏寫呈詞誣稱縣役黃星等與袁  
氏偕飲被營兵遇見觸怒縣役生計毒兵該縣張  
令聽信衙役虛詞捏詳等語屢次詳報泰安營叅  
將轉報兗州鎮臣岳含奇移咨巡撫衙門竝咨呈  
到臣該千總又因按察司批縣詳文有飭泰安州

移營革糧嚴審取約束不嚴職名詳叅之語亦稱  
按察司不合在臬司為一省執法大吏營兵如此  
不法其批移營革糧取約束不嚴職名詳叅有何  
不合至臣忝膺總督管轄文武批令革糧該弁竟  
敢抗違不遵幾欲使督撫臬司亦不能懲治悍兵  
其意以為不革名糧則有司不得而審捏詳縣令  
毒兵則將鎮必然主持可以挾制問官在該弁掩  
飾已過之罪猶小而庇護悍兵長惡之風實漸不

可長今據山東布按二司審據蕭殷成馬守業等  
將強拉民婦採打撕衣以及鬧堂情由歷供不諱  
臣是以據實嚴叅請

旨革職嚴審究擬庶幾懲一儆百營員縱庇之習可除  
而兵丁亦稍知守法斂跡矣再兗州鎮臣岳含奇  
自知前此被其欺朦將千總馬紹援約束不嚴徇  
庇捏詳職名呈叅前來除將馬紹援繕疏

題叅併將據詳率轉並不駁飭及未據揭報之歷任

兼轄叅將一併附叅外緣此案情節臣為整除東  
省營伍積習起見理合據實恭摺

奏明伏乞

睿鑒謹

奏

所奏甚是此案理應嚴叅示懲

同日又

奏為恭懇

聖慈事竊臣至愚極陋遭際

聖明於雍正二年九月奉

命署理河南巡撫因凡有進呈

奏摺既不能親自繕寫又不敢假手他人經臣恭摺

奏懇請將臣婿湖南湘潭縣縣丞崔鐸掣回在臣左

右以供書寫仰蒙

聖恩俞允今臣現藉指臂

鴻恩異數固已感淪肌髓查崔鐸係臣妻所生長女之



婿尚有臣妾所生一女臣前任吏部員外時與原任吏部員外郎存柱同為部屬因將臣次女許字與存柱次子薩來為婚雍正二年臣任河南布政司時薩來至署畢姻後即回京臣女時因抱病未能偕去迄今依留在側薩來係正黃旗滿洲杜太佐領下現充副護軍每月五班輪守

禁門旗人既不得遠至他省況當差行走非經

奏明給假更不敢私有所往數年以來薩來遂未至

豫其父存柱併其母俱經物故臣因視婿如子念其年齒尚少恐失訓誨思欲面為教導俾得更歷世事知有長進且臣素性拘謹事無大小期於慎重即如酬應賓從傳述語言等類臣雖不必親歷其事亦必欲得一骨肉相依誠實堪信之人以相委託長婿崔鋁既已代臣書寫事無兼顧而次婿薩來人頗樸直畧諳清字清話查護軍原非職官用是不揣冒昧仰懇

聖慈俯將薩來

此事卿何不早奏夫元首股肱君臣原屬一體有何不  
賞准隨臣任所一二載臣可藉以照應瑣細并得隨事  
可達之隱衷舉凡意而不自申皆緣見理未真隔於  
訓勵庶可造就成人益知當差行走且開封有城  
尊卑之勢耳守駐防或遇緊要知會事件及各省將軍衙門來

咨用清字文移者竝可令其譯識亦復稍有所助  
臣以被

恩高厚自知身家悉荷

生成無論公私悉皆仰賴

聖主是以舐犢微忱屢致上瀆

天聽玆玆下情伏惟

聖慈矜宥則臣世世生生永矢啣結矣臣無任惶懼戰兢之至謹

奏

已命薩來詣豫矣卿其留署訓誨但於召見之際審視材器甚屬庸碌不堪即伊父存柱朕雖未經識面觀其罪案纍纍要非端人可知何乃與之結婚而選此一婿

耶薩來在旗乃一無用少年不必拘定一二載竟可久  
留在豫俾令學習果稍有增進時再行奏聞然朕據其  
資質而論確係愚詐無識之流豈特不足委託且宜留  
心約束也

雍正八年四月十三日河東總督臣田文鏡謹

奏為恭報豫省雨澤日期仰祈

睿鑒事竊查豫省三月初七初八以及十四十五等日  
節次時雨滋沛田疇普渥經臣恭摺奏

聞欽奉

硃批覽奏豫省膏澤調勻麥已結穗穀黍俱長發茂盛  
東省又已及時得雨朕懷曷勝慰悅都中自入三月  
以來日起風霾甚覺乾旱於此奏未到之前一日荷  
蒙

天

祖眷祐慈恩甘霖大沛郊野優渥而山陝兩省亦於月之  
中旬各報霑足朕惟額手欣慶期與卿等共勉寅畏

以敬迓秋成之

嘉貺耳欽此仰見我

皇上宵旰憂勤誠格

天

祖而尤朝乾夕惕

訓誠彌深此誠

聖人無逸之心

聖敬日躋之驗也茲查開封竝通省闔屬地方亦於三

月二十五日普被甘霖二十八日三十日以及四月初四日接連遍沛據各州縣申報得雨七八九寸竝一尺尺餘不等咸稱高下地畝俱已深透暢足民間歡頌婦子同聲臣惟有仰凜

聖訓當與所屬官員益深誠敬嚴恪之思祇待上天秋成之賜所有豫省得雨日期臣謹恭摺奏

聞再山東闔屬州縣有據報於三月初八日得雨二三四寸不等者有報於三月十一十二等日得雨三



四五寸不等者有報於三月二十五三十日得雨  
四五六七八寸不等者所有二麥俱各秀實各項  
秋苗亦皆旺發理合一併

奏明伏乞

睿鑒謹

奏

朕因京都邇來亢旱日夜殷憂畿南接壤惟豫省最近  
正在繫念間適閱此奏頓釋一半焦思矣

同日又

奏為遵

旨密奏仰祈

睿鑒事竊查社倉積穀每年實貯數目經臣逐一奏

聞在案茲除舊管雍正六年分共捐貯穀麥豆蕎一十

七萬七千八百四十六石一斗零外今據河南布

政使趙國麟查據開封等八府屬汝陳等七州并

所屬彙報雍正七年分新收捐穀二萬五千六百

二石五斗零豆二十四石八斗蕎麥五石三斗稻  
穀二石八斗茭草籽六斗息穀一萬一千七百六  
十六石六斗以上共三萬七千四百二石八斗零  
實在新舊二項貯倉共二十一萬五千二百四十  
九石零臣并檄行各屬轉飭各州縣正副社長加  
謹收貯仍飭地方官不時稽查勿致侵缺至雍正  
八年秋收後勸捐穀石俟有成數另於次年查明

奏

聞所有雍正七年分各屬實在捐貯社倉新舊穀石數

目理合恭摺密

奏伏乞

睿鑒謹

奏

豫省社倉緣奉行得法年來漸有成效已有旨諭部議  
敘矣但有司奉行善否尤宜體察

同日又

奏為欽奉

上諭事雍正八年三月二十八日臣准吏部咨奉

上諭武昌道徐聚倫著臣於河東二省道員內酌量一

員與徐聚倫調用欽遵移咨到臣臣查豫省所屬道

員內如河北道朱藻分巡三府職任修防該員吏

治河工兼能整頓現據報丁母艱臣因要地幹員

難以拘於成例且有荊隆口開挑引河正資儼辦

業經會疏

題請留任守制現在恭候

諭旨不便改調又管河道祝兆鵬前任歸德府時臣見其辦事勇往勤於河務因管河道員缺蒙

恩垂詢經臣密舉給咨赴部引

見奉

旨補授乃該道始猶謹慎近竟頓改前操恣意貪婪指稱完伊前任忻州虧空屢將屬員應領歲修搶修銀兩勒借扣留而且發銀尅短甚屬不職臣已訪

察確實在據實另疏嚴叅所有此管河道一缺  
應候

皇上欽簡熟諳工程人員亦非徐聚倫所宜再如南汝  
一道統轄南汝兩郡光汝兩州界連江楚最易蔽  
姦民風刁悍素稱難治前任南汝道孫蘭芬振戢  
有方稍知斂跡至其調任後正署迭更李英撫馭  
乏術澆風漸長今自董自超到任以來親歷各處  
遍察利弊該道強幹精明不避勞怨可稱有守有

為臣正需其竭力督率以資整飭亦未便移易至  
開歸道管理通省驛鹽糧務一切察除陋弊經理  
漕運悉其專責今該道張建德係由衛輝府知府  
補授開歸向在衛郡原係辦漕水次漕務本其熟  
諳而人又老成練達辦事精勤所以雍正七年漕  
米較前更早十月內即行趲運出境仰荷

天恩將臣議敘准加二級在案是張建德之辦理漕糧  
現在著有成效臣實藉為指臂必俟豫省人員內



復有經理得宜之人可以接手方可移易又臣東  
省所屬道員內如登萊青一道駐劄萊州控制海  
疆且此數郡地方距臣最遠必得深堪委信之人  
方免鞭長不及之慮孫蘭芬調任以來加意振作  
約束屬員咸知凜畏況該道又係楚人亦難用於  
原籍如兗寧道呂維炳業經江南河臣孔毓珣題  
調淮徐緣其現在勘估山東江南兩省水利臣復  
奏明暫留東省容俟此案查明定議之後再赴新任

欽定四庫全書

硃批諭旨

卷一百二十六之二十

三八

是呂維炳亦不便與徐聚倫調換如濟東道張體仁現在曲阜

廟工承辦緊要未可猝更如鹽法道楊弘俊甫經到任而東省鹽務該道於前任登州府時洞悉利弊今甫飭交辦理亦未便更易惟查有山東糧道朱濡到任未久辦理漕務未能妥協武昌尚屬簡易朱濡堪以調補蓋東省漕務向稱弊藪旗弁恣意措索相習為常臣於上年將應給旗丁運弁各項

用費酌量給與其額外繁費概行裁革經臣

奏明於奉

旨之後即通行嚴飭并出示曉諭在案適本年二月內  
朱潘前赴水次有弁丁迎至中途冒稟朝城范縣  
觀城三處米色不純意在欺朦該道新任借此恐  
嚇各縣索足舊規乃該道並不親查但遣家人承  
差包取樣米呈驗并令收拾圓潔正墮旗丁之計  
遂爾大肆措勒及規禮照前索足仍將原米受兌

是旗丁等之種種橫索皆由該道措置失宜之故  
但該道未能約束失於覺察尚非賊私劣蹟似可  
觀其後效且河東兩省道員別亦無可移易是以  
請與徐聚倫相對調用是否允協

天恩出自

聖裁至徐聚倫行為狂縱蒙

聖恩不加嚴譴仍以道員調補自必感激圖報俟其由  
豫赴任時臣當詳指利弊嚴加訓導即以東省整

頃漕務之事責成於徐聚倫如果能實心任事辦理妥協臣不敢掩其所長倘或任性縱恣舉動乖張臣亦不敢庇其所短自當據實指叅除另行繕疏具

題外理合恭摺

奏明伏乞

睿鑒謹

奏

朱潘堪與徐聚倫對調所奏是有旨諭部矣將朱潘極力訓誠然後命赴新任可也

同日又

奏為查明歸淮河道情形仰祈

睿鑒事竊惟江南清口淮黃交匯有關運道民生上年秋汛極大數次清水不能敵黃深厓

聖念仰蒙

皇上至誠感格保護平穩旋荷

頒發帑金加築高家堰石工瀦蓄清水逼溜刷黃誠為  
萬年底定之計臣因淮水出湖既湏激射衝流以  
壯其勢而上源諸水亦必暢滙入淮共成其大然  
後奔騰直注一往莫禦所有歸淮各河自應逐處  
勘明經臣覆摺奏

聞當於雍正七年十月內分委黃河同知今調任開封  
下南河同知陳儀歸德府河務通判劉曰章原任  
虞城縣知縣李槃等隨帶丞簿各員分往南汝開

歸四府六州等屬將所有歸淮河道一一細查有  
無淤淺阻塞散溢之處確勘明白即飭地方官疏  
濬具報茲據該同知等勘覆前來臣謹按淮水發  
源於桐栢縣之胎簪山淤流三十里泉源湧出是  
為淮井又淤流二十六丈成渠東注歷信陽正陽  
羅山息縣光州固始入江南霍丘縣界滌洄豫省  
計長五百八十里其全豫之水來與淮會者共計  
二百七十餘道羣趨競赴於淮惟其遠近滙歸之



多皆有助清敵黃之力故必一律深通方能合流  
奏效今查明上源各處悉屬暢達其間偶有淤淺  
者各該地方業已遵照疏濬深通並無壅滯但豫  
省上源循流貫注而下源之在江南境內者亦各  
支支暢達則沛然匯湖可以飽蓄其勢併力抵黃  
臣聞洪澤湖湖水出口之處有張福口裴家場張  
家莊爛泥淺三岔河并天然天賜凡引河七道其  
天賜引河聞前已淤淺自三月以來又復流通然

亦不甚深濶此皆淮水出口之處所關甚鉅若臣  
移咨江南督河各臣誠恐地方各官視為鄰省咨  
行之事未必實力疏濬仰請

皇上敕下江南河督各臣將淮水出湖之處竝境內一  
切歸淮各河委官查勘如有淤淺處所立即疏挑  
并引河亦相機設法速治深通務俾暢流匯注如  
此則上源之水既盛出口之勢又強以之制黃而  
河流順軌以之刷口而積墊咸除矣謹將淮河自

桐栢發源起至青口淮黃交匯處繪成總圖一幅  
竝將歸淮各河按照各州縣繪為一冊臣敬裝潢  
成帙恭進

御覽伏乞

睿鑒謹

奏

覽奏窮原竟委究派尋支分合上下籌畫無遺具見卿  
慎重河防實心任事之意朕深為嘉予但專力助淮主

見固是倘淮水過盛其間亦恐有不虞非經督河諸臣  
詳查妥計何可草率施行蓋言利尤宜先慮其害也候  
交河臣議覆有旨

同日又

奏為通行條奏事雍正七年閏七月內臣准戶部咨  
開大學士公馬爾賽等條奏直省各州縣令於大  
鄉大村人居稠密之處設立講約所在舉貢生員  
內揀選老成有學者一人以為約正選樸實謹

聖諭

守者三四人以為直月每月朔日齊集耆民宣讀

廣訓其約正每年給廩餼銀六兩直月每名每年給廩  
餼銀六兩六錢各於該年地丁銀內按數給發官  
吏侵尅者查叅治罪奉

旨依議欽此欽遵移咨到臣備見我

皇上陶淑下民範圍斯世無不極其

恩施優渥臣即通飭遵照去後行據闔屬祥符等各州

縣選充約正之貢生白景易等直月生員裴珍等  
呈稱景易等生當

盛世時際

昌期沐

聖主之深恩舉

熙朝之曠典蠲免正賦遴選賢才重農勸稼行慶施仁  
當此時和歲稔正思圖報無由今蒙選充約正直  
月自應勉力趨公敬謹宣布所有廩餼銀兩籲請

免給以安葵藿下忱等情又據祥符等各州縣申稱竊念各生懇辭廩餼雖由誠心感激但卑州縣等膺茲民社荷蒙

皇上隆恩賞以養廉給以公費浩蕩

鴻慈有加無已況宣講

聖諭

廣訓實有司分內之事此項廩餼銀兩固不敢動支地丁銷耗錢糧亦不敢俯聽堅辭仰虛

盛典卑州縣等情願於養廉內照數捐給以盡司牧之責等情各呈報到臣伏查講約一事奉行已久臣為州縣時曾按月按期實心宣布遍傳齊集其始雖則有人其後漸亦稀少臣是以知非講者之不力實由聽者之前亦非未設廩餼不足以鼓舞講約之人實由聽講之人不能每月朔望齊集大抵一年之內止可於春仲秋末冬初農功告竣乘隙宣講故豫省約正直月懇請免給廩餼雖出



肫誠究亦知村鄉講約實有不能按月按期舉行  
如式者無功食餼良有未安況約正直月既於舉  
貢生員內選擇充應率皆守分讀書衣食不乏之  
人原無藉於廩餼合計直省州縣一千四百有餘  
其中大鄉大村應設講約之所者知復何限應給  
廩餼每年不下數十萬兩在我

皇上深仁愷澤下逮旁流舉凡有益於

國計民生者輒不惜費帑金用以垂利萬世然果能

實在舉行不致虛糜閭閻黎庶欣欣無倦臣亦何  
敢謬有異議但臣身親其事目覩其情今以歲費  
國帑數十萬金於無益之地雖經廷臣議定臣實不  
敢明知而因循茲既據約正等懇辭廩餼各州縣  
又復情願捐發臣思村鄉講約一歲之中不過春  
仲二月秋杪九月冬間十月十一月計此四箇月  
每月朔望宣講共有八次其約正直月承應之日  
甚少不妨本業似無庸議給廩餼況各州縣俱蒙

天恩賞有養廉公費等項其約正直月每逢宣講月分  
即該州縣酌量捐酬為數無幾實皆情願在選克  
之生員等亦復義有可安而正項錢糧竝無濫銷  
侵尅之弊臣不揣冒昧另疏具

題庶各省督撫見臣據實

奏明亦必仰請更定均無瞻顧之慮而經費各有撙  
節矣是否允協伏乞

睿鑒謹

奏

所奏甚屬可嘉無庸另疏具題即將此摺交部改本頒發諭旨矣

同日又

奏為欽奉

上諭事雍正八年四月初五日據臣齎摺家人回豫捧到

皇上發下前任河南布政使費金吾保薦原任彰德府

知府胡泰一摺欽奉

諭旨胡泰係費金吾於六年奉旨保薦之人昨伊來京  
陛見復又言及其人可用卿以為何如人耶欽此竊  
思進賢退不肖乃臣子事

君之大義我

皇上求賢若渴圖治彌殷為人臣者若不能仰體

天心舉所當舉而劾所當劾其負

恩孰甚負罪孰甚臣查原任彰德府知府胡泰乃一柔

姦之小人習成巧宦之態度外似明白和平中實詭譎難問其在彰德府任內凡委以公務無一實心辦理者是以臣當日就其徇庇武安縣唐紀虧空一事

題叅而其中原委有原疏所未載者謹另單備細臚列恭呈

御覽惟是費金吾於臣

題叅胡泰徇庇虧空之後即以已經密保胡泰情由

告知於臣并言所保不得其人惟恐

天語下詢求臣善為回奏臣當日但知費金吾怕叅胡  
泰徇庇專為保舉起見未料胡泰復有虧空且其  
中有如許情弊迨後臣察知原委而唐紀虧空之  
錢胡泰虧空之穀業已完足臣因事屬已往費金  
吾又人尚明白老練堪為

國家效力若以之

題叅未免可惜臣是以中止此臣徇庇之咎實所難

辭也臣每以人材難得惟思曲為造就收效臂指  
即或其事有不得不參而其人尚有可用者又未  
嘗不仰請

天恩格外錄用費金吾前在臣處既深懼所保之非今  
在

聖主之前又仍奏其可用臣雖不知其何心但胡泰如  
此存心行事而費金吾謂其居官敬慎有守有為  
有猷臣實未敢信也臣受



恩至深賦性至拙惟知

君父之前一字不欺一私不涉況人材之賢否蒙

聖主之垂問臣又何敢稍為附和不敢實直陳以蹈欺

罔之罪也謹遵

旨覆奏所有欽奉

硃批諭旨及原摺一併恭繳伏乞

睿鑒謹

奏

覽奏其中情節業俱備悉費金吾是誠何心也日前對朕尚云卿因一時之怒將胡泰叅劾後復深惜其人等語伊料朕必以其言為準斷不更詢於卿而為是僥倖之舉耶殊屬可笑朕初謂費金吾難以憑信卿第盛言其好今竟何如雖然老成歷練伊實有焉亦安可沒其所長姑試用看

雍正八年四月二十七日河東總督臣田文鏡謹奏為奏明東省藩庫平餘仰請

聖鑒事竊照藩司衙門錢穀總匯儲財賦以裕

國用所關綦重收發出納之際必須矢公矢正詳慎  
彈克不可絲毫重輕致啓弊竇茲據山東布政司

孫國璽稟稱該司抵任後接受陞司交代據冊開  
平餘銀二萬五千二百六十兩零一項本司未悉  
平餘始末隨經面問陞司費金吾據云自雍正六

年七月二十一日到任起至雍正八年二月初一  
日卸事任內支放過正項耗羨共銀六百九萬三

千餘兩共平餘銀三萬兩零除用去銀四千九百餘兩已經自行

奏明外尚存銀二萬五千二百六十兩零此項平餘雖無定數然每平約有七八錢不等等語本司隨將陞司所交在庫銀兩傳同庫官抽封彈兌費金吾未到任以前收存銀兩有每百兩恰符正數者有每百兩餘一二錢至三四錢不等者至費金吾任內則每百兩有餘三四錢至五六七八九錢不

等者本司起初猶以為收放之間零星擠出平餘  
即在向日一八耗羨之內及細加查核究詰乃知  
東省向來一八耗羨今蒙

皇上特賜蠲免二分止照一六耗羨州縣除扣留公費  
及解費外其餘耗羨全數解司此項平餘實在昔  
年一八今年一六耗羨之外且又不便明加令庫  
官高下其手每平暗含此七八錢以符平餘之數  
在州縣則因解司時有此一項平餘是向之一八

者實需一九今之一六者實需一七若多徵自民  
則恐上司之提封抽兌劾以重耗若實止一六則  
此項平餘無從出辦且查此項平餘惟支送巡撫  
養廉布政司自支養廉及放撫標兩營兵餉俱係  
原平竝無平餘外其他收放之間輕出重入方得  
有此平餘之數我

皇上屢沛如天之恩蠲免動盈數千百萬此項平餘即  
使每平俱足八錢每年不過二萬餘兩且又高下

其手難為準則若留此項名色則州縣徵收錢糧難以一六耗羨遵行謹備敘實情稟祈裁奪

奏請

聖鑒將此平餘一項豁除州縣起解錢糧照依河南俱令按準庫平自行滴珠本司於收兌時督率庫官釐毫不許多重至支給各營兵餉亦照依河南俱以所收州縣庫平原封給放毫無輕出重入之弊一應州縣徵收錢糧俱得約束令其遵奉

恩旨一六徵收如有絲毫重徵嚴加叅核從重治罪如  
此則上下畫一不獨各州縣易於遵守而東省黎  
庶不至暗增重耗感激

皇仁永於千萬世矣倘蒙

俞允本司將各任交存在庫銀兩竝本司到任後所收  
銀兩逐封兌准將所有平餘數目另行造冊詳請  
奏明候充公用等情到臣臣查正雜錢糧絲毫為重  
職司筭鑰固應搏節經費惟是本無平餘而必設



此一名以重入者為收兌之餘以輕出者為支放之餘貽弊滋累豈堪為法此甚非所以仰體我皇上加惠元元清理財賦剔蠹釐姦之

聖意也今孫國璽請將平餘豁除照依豫省州縣起解錢糧按準庫平各令自行滴珠藩庫支放兵餉即以原封給發庶州縣徵收錢糧俱得令其恪遵一六徵耗是否允協臣謹據實

奏明伏乞

聖明裁鑒謹

奏

此舉甚善諸凡貽弊滋累之陋習自應釐剔淨盡勿留  
端緒

同日又

奏為奏明東省道府倉監穀仰祈

睿鑒事雍正八年四月二十一日臣接閱山東撫臣岳

濬來札云日前湖北撫臣費金吾入

觀旋東道及東省府倉分貯穀石可以不必多貯從前  
分發州縣之穀可以免其運回存貯監穀照依常  
平一例糶三俾免陳腐之虞等情曾經面

奏奉

旨令與督臣確商具奏今費金吾以抱疴未痊由濟寧  
水路赴任想其面奉之

旨自當敬錄馳達不知此案應如何定議覆

旨惟祈裁示等語致字到臣臣隨查費金吾自入覲

天顏回東曾兩次致書與臣其前項倉穀

奏奉

諭旨緣由竝無一字言及今山東撫臣岳濬既以此詢

臣是湖北撫臣費金吾必經

奏明或以病中未曾敬錄

諭旨示臣臣謹將此事原委據實備細奏

聞仰請

聖鑒臣查東省倉穀於欽奉

上諭事案內據費金吾在山東布政司任內按照州縣  
衛所大中小酌貯穀石不足者將穀價撥買有餘  
者將穀價撥出其濟南青州萊州登州四府原存  
監穀照前收貯未買穀價提貯司庫經臣會同撫  
臣岳濬據詳具

題奉

旨依議欽遵在案迨雍正七年十月二十五日據費金  
吾詳請將兗寧道及濟青萊登四府現存各州縣

穀一十三萬四千八百九十石零即存貯各州縣  
免其運回以省脚力每年

奏銷於各州縣倉內登明道府款項造報等情詳臣  
核

題臣隨批云從前道府設倉積穀自有深意竝非為  
現今買撥之各州縣而設況東省倉穀已經遵  
旨酌量州縣大小均勻分派奉

旨依議通飭遵照在案今若再令德州等三十三州縣

衛分貯道府倉穀一十三萬四千八百九十餘石  
多寡參差與均勻派貯之

諭旨有悖且克寧道監穀已撥三十餘萬石濟青登萊  
四府捐米折穀已提解價銀一十五萬有奇較原  
貯之數亦俱減少不便再行分撥況濟青二府從  
前請撥州縣分貯奉部嚴駁該司於派買案內各  
府報買穀石現在實貯竝無那移卸責等語是該  
府等倉穀俱係實貯府倉設彼時已分撥州縣該

司何不將抗違勒派職名開報又何以不將此項穀石造入州縣存倉數內一併均派今經一載突以道府運回需費混請分貯甚屬不合仰即嚴飭各該府著落違例勒派之員速行運回府倉收貯仍查明有無抑勒屬員短發價值情弊開具侵扣派買職名報叅其撥借克寧道倉穀亦即飭令受借州縣運送道倉取倉收送查等語此臣批費金吾請分貯道府倉穀之詳也又於雍正八年二月



初八日據費金吾詳登萊青三府存貯監穀除新穀外其舊穀共二十二萬四千三百餘石已存貯十餘年或二十餘年雖無霉爛俱屬陳久不便再為堆貯詳請

題明出糶於秋後買補新穀以備積貯如糶價每石不敷三錢著落雍正元年至雍正六年之正署各知府分賠如秋後買穀時價每石出於三錢之外應於存司耗羨銀內添補等情臣隨批云存倉積

穀自應隨時出易以免紅朽今登萊青三府倉穀  
竝不早為經畫以致陳久將腐叅賠亦復何辭況  
此項穀石原係收捐積貯竝非當日每石發價三  
錢採買者可比今稱買穀時價如出三錢之外於  
存司耗羨內添補殊屬不合飭再另行確議詳報  
此臣批費金吾請糶登萊青三府陳穀之詳也迄  
今任催未據詳覆是以尚未具

題臣思分買監穀欽奉

恩旨照時價添給者因從前原照三錢一石發價所以  
照時補給今存府倉穀乃從前收捐之項非三錢  
一石發買之穀典守各官不早為悉心經理致積  
久陳腐是誰之過若所糶之價不敷秋後之價自  
應著落從前不出易之各知府分賠豈得以價過  
三錢一石請動司庫耗羨添補至登萊青三府為  
邊海要郡而青州府又現設滿洲官兵駐防實與  
他郡不同積貯寧使過於充裕不可稍有不足查

登州府均派案内原報貯穀十三萬一千三百石  
零未奉部覆之先又買穀二千六百三十九石零  
共穀一十三萬三千九百餘石據冊開分貯州縣  
穀四萬六千九十餘石止存府倉穀八萬七千八  
百餘石萊州府均派案内原報貯穀一十八萬八  
千三百餘石并續買穀五千九百餘石未奉部覆  
之先又買穀一千八百餘石共穀一十九萬六千  
一百餘石據冊開分貯州縣二萬三千四百餘石

止存府倉穀一十七萬二千六百餘石青州府均  
派案内原報貯穀一十八萬九千三百九十餘石  
未奉部覆之先又買穀三萬二千八百餘石共穀  
二十二萬二千二百餘石據冊開分貯屬縣二萬  
七千二百餘石止存府倉穀一十九萬四千九百  
餘石臣查此三府倉穀存貯充裕若各減去數萬  
石雖不為少但所屬州縣已按大中小遵

旨均勻派足亦不便再加況分貯州縣有多至五六千

石至一萬石以上者今若以府穀而加貯於州縣  
是但有便於勒買之知府使之脫身全不為後來  
承接之州縣計及也再濟寧為水陸通衢兗寧道  
存價未買穀除撥發各州縣買穀三十三萬一千  
二百餘石該道衙門惟存原穀并剩價買穀共七  
萬五千七百餘石據冊開分貯各州縣衛二萬六  
百餘石止存穀五萬五千餘石雖該道衙門存穀  
亦不為少但州縣各又加增數千石不等俱浮於

原定之數且中衛原議貯穀五千石如東昌衛本該貯穀五千石今反分貯道倉穀四千八百餘石幾至加增一倍此實有未便者臣今再四思維各州縣應貯穀石已按大中小酌定其分貯道府之穀數止千石以下者猶可聽其分貯竟作州縣貯倉之穀其多至數千石及萬餘石者州縣衛實亦不便多貯應否飭令運回或以道府現存倉穀不少令分貯之州縣於出陳易新時將此穀石糶價

提貯司庫俟有動用再行發買至如萊州府之掖  
縣登州府之蓬萊縣皆近在同城竝無遠運之費  
應仍歸府倉不得分貯屬縣亦無庸糶價解司再  
積貯本為地方至計久積難免紅腐此項監穀自  
應照常平倉之例於春月青黃不接之時存七糶  
三輪年出易既於民食有濟又於倉貯有益臣謹  
繕摺恭

奏伏乞



聖裁批示以便欽遵另行具

題謹

奏

費金吾業經物故前項倉穀卿與東撫岳濬酌商妥協而為之可也其一人之見原無足憑況所區畫又不合宜耶

雍正八年五月初六日河東總督臣田文鏡謹

奏恭請

皇上聖安

朕安

知卿精神體氣健旺如初甚為欣慰但已年近古稀切勿逞力自矜於一切處慎重愛惜為宜莫辜負諄諄訓諭之意可也

同日又

奏為恭謝

天恩事竊臣接准部咨奉

上諭北河總督印務

命臣暫行兼管除另繕

奏本恭謝

天恩外伏念臣至愚極陋莫效寸長仰蒙

皇上眷顧逾格矜全備至而頻歲以來豫東兩省咸荷

聖主昭格

天

祖錫福臣民是以年穀豐稔黃運安瀾臣幸際其盛藉免

隕越然每念兩省機務至重至繁臣雖夙夜凜惕  
小心從事但智識短淺誠恐措置一有未當精神  
或有未周豈惟覆餗滋譴上負

聖明抑且對影抱慚有覲面目乃蒙

皇上不以臣為菲薄委任日隆復

命臣兼管北河臣實益增感泣蓋此總河一官轄豫東  
兩省黃運湖河堤岸工程上關

天庾之儲下繫民生之重查勘督率必須親身來往修

防搶護尤賴指示機宜目下伏秋屆汎尤為緊要之時我

皇上精誠默契河嶽懷柔自可保其循軌安流永慶底定惟是總督衙門事宜勢難離署辦理如臣前歲巡歷東省各房書吏帶至百十餘人各項文卷拉載三十餘車今兼管北河奚能周歷調度隨途辦事況臣於河務機宜實未曉暢但蒙

聖恩垂鑒

命臣暫行兼管而且預厪

宸念恐有懷挾私怨之人作姦滋弊嚴頒

聖諭體恤周詳跪讀

溫綸淚與聲墮臣雖草木具有微知臣雖犬馬矢當竭

力惟有盡摠愚誠殫茲心血以期仰報

天恩於萬一耳所有感激微忱合先恭摺

奏謝伏乞

睿鑒謹

奏

卿勢難兼顧朕豈不知蓋因一時不得其人而然也昨命范時繹往署河督之旨甚明卿封疆責重祇可恒居總督任所坐理一切指授機宜耳范時繹今番若不竭力奮勉以贖前愆則非人類矣大抵於此任自必相宜俟其受事後試觀心行若何據實奏聞朕另有裁奪

同日又

奏為欽奉

上諭事雍正八年五月初三日臣准部咨奉

上諭南河總督印務關係緊要著尚書嵇曾筠前往署理北河總督印務著田文鏡暫行兼管欽遵移咨到

臣除恭摺奏謝

天恩外竊惟河務重大臣既仰邀

恩命即當受印視事以便嵇曾筠交代起身前往新任但查黃河北岸封邱縣所屬荊隆口地方素稱險要近因黃流從黑堽口迤下自南而北三十餘里



大溜頂衝直注荆隆口奔騰浩瀚勢如建瓴衝塌  
河崖離大堤僅五六十丈不等經河臣嵇曾筠親  
往勘度查自黑堽口迤下起至柳園口陡崖現有  
引河形勢急宜開挑導水東注可以永保無虞河  
頭河尾計工長三千三百五十丈於本年三月內  
會同臣等

題估一面動撥河銀分委廳汛員弁興工償挑今河  
身業已挑挖告竣惟俟汎水一至即可開放以慶

底績臣查引河奏效全在開放之一時指授得宜則乘機導注亨利無窮若調度偶有未合不但無益工程而且運道民生胥受其累臣於開挖引河大槩僅得之傳述實未親身經歷不敢自信河臣嵇曾筠於開放引河則已數經其事熟悉機宜臨時調度悉出萬全今荊隆口引河為垂成緊要之工必得藉其指示開放收功頃刻為久安鞏固之計況時已仲夏汎水尅日可至而嵇曾筠亦為開

放引河現駐工所大工未竣不能放心而去是以  
臣與嵇曾筠面相商酌俟其開放引河之後再為  
交代庶險要有可藉之人而工程無意外之虞且  
此旬日之間凡有河務重大事件緊要工程竝得  
就近臣與悉心籌酌庶接手辦理頭緒亦清臣因  
荊隆口為自來最險之地而開放引河實千萬年  
底定之工不敢不慎重其事是以冒昧

奏請

聖慈仰祈

恩允俯俟河臣嵇曾筠開放引河後再為接印視事伏  
乞

睿鑒謹

奏

所請甚是既有緊要工程共相籌酌便多留數日亦無  
不可

同日又

奏為欽奉

上諭事竊照山東兗寧道呂維炳經原任江南河臣孔

毓珣

題補淮徐道奉

旨俞允其兗寧道缺

命臣會同揀選題補嗣臣因呂維炳現在委勘山東江南兩省水道請俟勘估事竣再令前赴新任仰蒙聖恩俞允茲呂維炳於四月二十一日勘畢回署其一

應修濬建築等工容俟河臣嵇曾筠再行親勘商  
確定議會疏具

題呂維炳勘估已竣應遵

旨令其前赴新任將兗寧道缺揀選題補惟是兗寧一  
道管轄運河千有餘里又有曹單兩縣北岸黃河  
堤工并分巡地方之責員缺甚屬緊要臣於兩省  
道府內幾經酌選非人地不甚相宜即本任原係  
要缺未便移易甚難其人惟查有山東兗州府知

府王鴻勳前任河南鄭州知州係濱河要地該員才具幹練辦事勤敏雍正七年三月內兗州府知府員缺奉

旨著臣於河南山東兩省屬員內揀選題補臣因兗郡事繁賦重兼有督率疏濬運河之責當經疏請補授蒙

恩俞允該員任事以來感激

皇仁實心整飭努力任事若以補授兗寧道缺洵為駕

輕就熟甚有裨益臣與河臣嵇曾筠面商意見亦俱相同但查伊父原任通州知州王友直拖欠侵欺銀兩無可著追應在該員名下解任追賠經山東撫臣岳濬據情

奏請仰荷

皇上如天之仁從寬免其解任其代伊父賠補銀兩亦著豁免竝

命傳諭勉為良吏該員感淪肌髓圖報彌殷正宜在知



府任內黽勉效力況其由知州超陞知府甫及一載今如以之

題補道員似屬過驟臣因遲回至再未敢輒行疏

題然員缺緊要此外又難其人不揣愚昧謹繕摺恭奏仰請

聖裁如蒙

天恩俞允竝懇

頒降

諭旨以便欽遵臣為吏治河防起見是以逾格

奏請伏乞

睿鑒謹

奏

克寧道一缺從前嵇曾筠曾薦托克托海以為人地相  
宜今覽卿奏但云以王鴻勳補授之處與嵇曾筠面商  
意見相同而並未言及托克托海朕觀二人似屬皆可  
卿等就中酌一允協者具題請旨惟期要缺得人何論

陞遷之遲速則例之合否耶日前保題之諭原料卿等自必仍保托克托海非謂托克托海不可用而命另揀別員也恐錯會朕意故諭及之

雍正八年五月十七日河東總督臣田文鏡謹

奏為引河開放成功萬年永慶底績事竊查荊隆口地方挑挖引河計工三千三百五十丈地險工長  
經臣

奏明俟開放引河後河臣嵇曾筠再赴南工正在祇

候

聖諭茲於五月十六日據河北道朱藻稟稱河頭河尾  
工程已於本月十五日一律告竣甫完畚鍤即於  
十五日戌刻汎水陡漲二尺六寸漸至三尺有餘  
與河頭崖岸相平該道即差員飛赴荊隆口稟請  
河臣嵇曾筠協理河臣徐湛恩齊至河頭督率廳  
營各汛員於十六日子時乘勢開放暢流奔注頃  
刻深通查河面原開寬十餘丈今已刷寬至二三

十丈不等原開深九尺一丈不等今已刷深至二  
三丈不等迨至十六日辰刻即有重載客船從新  
河來往駕駛莫不共頌神速等語臣查河頭河尾  
甫於十五日完工而不先不後即有汎水陡至自  
戌至子計汎到開放未逾三時而萬年底定之功  
成於指顧此皆由我

皇上至誠至敬昭格

天

祖神明默相垂利無窮兩河億萬蒸黎咸登衽席羣戴  
皇仁所有引河開放成功緣由理合恭摺奏

聞仰慰

聖懷再引河既經開放臣候河臣嵇曾筠到省便當接  
印嵇曾筠即可馳赴南工合併

奏明伏乞

睿鑒謹

奏

覽奏荆隆口引河開放成功深慰朕念

同日又

奏為據實奏懇

聖恩事竊臣荷蒙

恩眷高厚無比自惟竭此衰鈍仰酬萬一臣自病愈之後雖飲食如常而精力未免稍弱所恃藥餌早晚資補以時調攝但本處醫家既乏精曉之人而他省延來者又皆名不符實是以臣前此抱病惟恃

按察使陳世倬開方調治曾經

奏明迨至痊愈之後陳世倬仍復時為診視迄今所服方劑皆其加減殊有裨益但臣與臬司分關統屬時常出入礙於形跡今蒙

聖恩署理藩司事務更繁若以醫道分其身心亦有未宜蓋以之處暫則可以之處常則不可也臣屢囑陳世倬訪求良醫又復難得其人因言伊有胞弟陳世倸者係浙江甲午科舉人現寓都門明晰醫



理臨證亦多可以邀其來豫留住臣署臣隨囑其遣人相約茲陳世倬接到陳世倬家信云禮部侍郎錢以塏業經將伊保舉助教現在祇候引

見等語陳世倬既係部臣保舉之員臣又何敢妄希延至惟是臣身仰荷

聖恩顧復有加無已屢蒙

聖諭諄至加謹調攝臣亦何敢不重自保護在陳世倬深知臣之脈氣營衛又熟悉其弟之用藥治方可

以信任調補伏念臣受

恩最深無事不蒙

垂鑒不揣冒昧仰懇

聖慈俯將錢以塏保舉之助教陳世倌

賞發給臣俾得留於署中長有相資診視之人則從此  
犬馬不衰之年皆出

聖主恩賜之日也再陳世倌係大學士臣陳元龍堂姪

倘蒙

俞允竝懇

賜諭陳元龍即可令其束裝赴豫合併

奏明伏乞

睿鑒謹

奏

有旨諭部令陳世倌來隨伊兄陳世倬任所學習行走  
矣到豫之後可以資其診視但慮兄弟二人醫道未必  
便無同異至陳世倬係奉朕旨醫卿原可明宣於衆出

入督署亦復何礙之有其遵諭行無庸避此形迹

硃批諭旨卷一百二十六之二十